

Communicaziun a las medias dal cussegl dal public SRG.R

Rapports da RTR equilibrads ed infurmativs

Cuira, ils 21-09-2015 – **A chaschun da sia ultima sesida è il cussegl dal public SRG.R (CP SRG.R) s'occupà dals rapports da Radiotelevisiun Svizra Rumantscha (RTR) davart las sessiuns dal Cussegl grond dal chantun Grischun. El ha resguardà las contribuziuns en connex cun la sessiun extra muros ad Arosa (zercladur 2015) e cun la sessiun d'avust. Ultra da quai ha il CP SRG.R examinà er ils rapports da RTR en connex cun la votaziun davart la lescha da radio e televisiun (LRTV).**

RTR dastga esser pli critic

Las emissiuns d'infurmaziuns dal Radio Rumantsch e l'emissiuin da televisiun «Telesguard» rapportan a moda equilibrada e chapibla davart ils temas dal Cussegl grond. Il parlament chantunal sa raduna sis giadas l'onn e RTR infurmescha mintgamai davart ils temas principals. Tenor l'opiniun dal CP SRG.R fissan desiderablas en connex cun singuls temas consultaziuns d'experts e rapports mintgatant anc pli critics. En pli giavischass il CP SRG.R per tscherts temas in'approfondaziun e confruntaziun anc pli intensiva. Per motivs da temp n'è quai però betg adina pussaivel. RTR intermediatescha bleras infurmaziuns e dat a l'auditur ed a l'aspectatur ina survista da las activitads politicas en il chantun Grischun. En cumbinaziun cun la pagina d'internet www.rtr.ch rapporta RTR a moda cumplexsiva e cumpletta.

Rapports neutrals davart la LRTV

RTR e la SRG SSR han rapportà sezs a moda la pli equilibrada dal project da votaziun en connex cun la LRTV. La gronda part da las chasas da medias privatas han crititgà fitg il project e la SRG. Quai ha constatà l'Institut da retschertga per la publicitad e la societad en il rom d'ina examinaziun areguard ils rapports en connex cun la votaziun davart la LRTV. Il CP SRG.R conferma quest maletg pertutgant ils rapports da RTR. Al CP SRG.R èn dads en egl a moda fitg positiva er ils films curts da la redacziun per giuventetgna «Battaporta» concernent ils quatter projects da votaziun dals 14 da zercladur 2015. Sut il titel «Keep Calm and Vote On» ha quella infurmà a moda detagliada ed equilibrada giuvenils, però era creschids davart ils projects.

Archiv RTR

Il responsabel per la documentaziun ed ils archivs (D+A) da RTR, Alexi Monn, ha preschentà al CP SRG.R ses champ d'activitad. El ha rendì pli chapibla l'organisaziun, l'archivaziun e l'administraziun al CP SRG.R. Maletgs e medias audiovisualas vegnan digitalisads cuntinuadamain e duain star a disposiziun en il futur er online a circuls interessads. I na sa tracta betg mo d'emissiuns actualas, mabain era da perlas d'archiv da passa in mez tschientaner. L'archiv da RTR è interessant era per scolars resp. per persunas d'instrucziun – cunzunt las emissiuns da «Radioscola» realisadas da 1953-1990.

Perspectiva

A chaschun da la proxima sesida il november s'occupa il CP SRG.R surtut dals rapports da RTR en connex cun las elecziuns federalas 2015. Ina gruppa da lavur observa las emissiuns da la dumengia d'elecziuns. En pli sa participescha in comité ad in'observaziun cuminaivla da tut ils cussegls dal public da la SRG, nua ch'i vegn discutà il rapport cumplett davart ils rapports preliminars da las elecziuns federalas dals 18 d'october 2015. Questa observaziun cuminaivla duai promover la collavuraziun tranter las singulas regiuns linguisticas e las rinforzar vinavant.

Infurmaziuns davart il cussegl dal public SRG.R

Il cussegl dal public è in gremi consultativ independent che accumpogna la lavur ed il svilup da program da Radiotelevision Svizra Rumantscha (RTR) cun constataziuns e propostas. Il cussegl dal public sa raduna per regla quatter giadas l'onn. El observa ina tscherna da programs, emissiuns e purchidas online da RTR. Il cussegl dal public SRG.R s'engascha per in stretg contact tranter las persunas responsablas per il program ed il public. El sa cumpona da 15 commembras e commembers.

En cas da dumondas u per ulteriuras infurmaziuns:

Michael Spescha, president dal cussegl dal public SRG.R, telefonin 079 486 58 47
Anna Maria Ratti, secretariat SRG.R, telefon 081 255 79 79